

## **Oqaasiliortut ataatsimiinnerat**

### **Sisamanngorneq, Juunip 12-anni 2015, nal. 10.00 Oqaasileriffimmi.**

Peqataasut: *Carl Chr. Olsen, Stephen Heilmann, Eva Møller Thomassen*

Peqataasinnaanani nalunaartoq: *Karl Møller*

Ilaasortaanerminut tunuortoq, ataatsimiinnerulli aallaqqaataani ilisimatitsissutiniq apuussissalluni peqataasoq: *Katti Frederiksen*

Allatsi: *Judithe Denbæk*

- 1) Siulittaasoq tikilluaqqusivoq ilisimatitsissutigalugulu Katti Frederiksen Oqaasileriffimmi pisortanngornerminut atatillugu Oqaasiliortunit tunuarmat, taamaasillutillu Oqaasiliortut sisamaannangortut sinniisoqanngimmat. KF ataatsimiinnerup aallaqqaatani peqataavoq, ilisimatitsissutit Oqaasileriffimmullu attuumassutillit 3a aammalu 4a peqataaffigalugit. KFip ilisimatitsissutigaa juunip aallaqqaataanit Oqaasileriffimmi pisortanngorluni, sulisuniillu tigulluarneqarluni. Ilisimatitsissutit allat: Oqaasileriffimmi aningaasaqarnermik aqutsineq IRISikkut ingerlalerpoq, ukiumullu matumunnga Naalakkersuisoqarfimmit sipaarniuteqarfigineqalersoq 175.000,00 kruuninik taamaasilluni Oqaasileriffik katillugit 500.000,00 kruunit (14%-it) pallillugit atuivallaartussanngorluni. Studentervedhjælperit atorpallaarunnaarnissaat Per Lanngårdillu angalarnerisa ikilinissaat eqqaassanngikkaanni sipaarniarfissaqarpallaanngitsoq. Aggustimi sapaatip akunnerani 34-mi Roskildemi Nordisk Sprogmode netværksmødeqartitsissaaq qulequtserlugu nordisk sprogforståelse, Nordisk Sprogmodep akiligaanik angalanertalimmik Oqaasileriffimminngaanniit dagpengeqartinneqarluni, tassunga peqataasussatut taaneqarput Judithe Denbæk Oqaasiliortut allattaattut, Katti Frederiksenilu Oqaasileriffiup pisortaattut. Sapaatip akunnerani 35-mi Iqalunni ataatsimik allattaaseqalernissamut konferenceqartitsinissaaq pissaaq, tassunga immikkut qaaqqusaavoq Nuka Møller, CCO-llu nalunaarutigaa nammineq ilisimasaqarfigilluaramiuk angalarusussinnaalluni KF-illu tamanna taperserpaa. Sapaatip akunnerani 36-mi KANUKOKAp aaqquussuusaanik nutserisartunik seminareqartitsisoqassaaq, tassani Oqaasiliortut sinnerlugit JD peqataassalluni saqqummiinertalimmik, assigiimmik atuilernissaaq pillugu (one door principle), taassumalu ataani Oqaasiliortut oqaatsinik akuersisartutut kisiartaallutillu allannguisinnaasutut inissisimanerat

pillugu saqqummiissaluni. CCO-p tassunga atatillugu piukkuppaa eqqartuussinermit inatsit programmimut ilanngutissallugu, aammattaaq Tusagassiornermut Ilinniarfimmit KNR-imiillu peqataaffigineqarnissaat pisariaqartoq. Ilisimatitsissutitut naggasiullugu KFip kissaatiginartippaa Oqaasiliortut taamak pissaaneqartigitillugit sullinneqarnerat annerulissasoq, assersuutigalugu oqaatsinik ikiuutinik projekteqarnikkut, suliniutinillu kissaatigisaannik piviusunngortitsinikkut.

- 2) Kingullermik ataatsimiinnermit imaqarniliaq maajip 18-ianni 2015-imeersoq naqinnerlutat naqqiissutissaat taakkartoreerlugit taamaatsillugu akuerineqarpoq.
- 3) Oqaasiliortunut saaffiginnissutit
  - a) (KF peqataavoq) Robert Petersenip ORBOGENip naqiteqqinneqarneranit allannguutitut atuagassiaq Kalaalermi maalaarutaa, tassungalu atatillugu Oqaasileriffimmi sulisut utoqqatsissusiornialersarnerat. KFip ilisimatitsissutigaa RP atuagassiaq Kalaalermi tusagiasaarisimasoq ORBOGENip naqiteqqinneqalernerani allannguutaasimasut mamiagalugit toqqaannartumillu Oqaasileriffimmut aqqqissuisunulluunniit (Ilinniusiorfimmut) maalaaruteqarsimangitsoq. KFip erseqqissaatigaa Oqaasileriffik suleqataagaluarluni akisussaaffik aqqqissuussisuniimmat (Ilinniusiorfik) Oqaasileriffiullu suleqataanera tasaanerummat oqaatsit Oqaasiliortunit akuerisat ilanngutissallugit. CCOp ilisimatitsissutigaa ordboginik suliaqarnermi Oqaasiliortut avaqqullugit oqaatsinik ikkussuisoqarsinnaanngitsoq, Oqaasiliortut kalaallit oqaasiinut ordbogiliorneq akisussaaffigimmassuk mandateqarfigalugulu, taamaammat Oqaasersiummi Robert Petersenip Kirsten Gade Jonesillu akisussaasutut allaqqanerata peerneqarnissaa aqqutissaasinnaasoq. Suliaq inerineqarpoq utoqqatsertoqassappat naqitertitsinermit akisussaasut pisussaasut, toqqaannartumilli maalaarummik tiguisoqarsimangimmat suliaq naammassisutut nalilerneqarpoq Oqaasileriffimmullu KFimit nalunaarutigineqassalluni.
  - b) Inatsisinik nutserisoqarfiit Oqaasiliortut taaguummik allannguisimaneranik suliaassanngortitseqqisut/isummersoqqeqqusisut: lovbekendtgørelse aamma bekendtgørelse af lov. CCO-p naammagittaalliuut paasinngilaa, assigiinngissutaat erseqqissaatigisariaqarmat. Taaguutissatut aalajangiutaareersut Oqaasiliortut ataatsimiinnerannit 04.02.2015-imeersut allanngortinneqanngillat. Issuarnera: *“Lovbekendtgørelse nassuiaatitaa atorlugu imak taaguusissallugu Oqaasiliortunit akuerineqarpoq: Inatsisaareersut allannguutaanik eqikkarlugit nalunaarut,*

*Bekendtgørelse af lov kalaallisut imak taaneqartassasoq akuerineqarluni:  
Inatsimmik (nutaamik) nalunaarutiginnineq.”*

- c) Aalisakkat taaguutaat ‘aapapaqutsuk’ kingullermi ataatsimiinnermi aalajangigaq, 2013-imi Oqaasiliortut taaguusereersimasaat imak ‘siutaasalik’. Oqaasiliortut aalangiinnerminnut tunngavigisaat naapertuummata aapapaqutsuk grønlandsk ringbugimut taaguutaassasoq aalangiuisimaannarneqassasoq, siutaasalillu taaguutitut atorunnaassasoq Oqaasiliortut aalangerput.
- d) Ilinniusiorfimmit saaffiginnissutit – uumassusilinnut taaguutit (qallunaatut: havalger, mos, svampe, lav). Oqaasiliortut isummerfigaat siunnersuutit akuerisinnaallugit, taamaallaat Nunatta Naasuini allaqqareersut taaguutaat allanngortinneqassanngitsut, tassaammata taaguutaareersut botanikerip inuit akornannit ilisimaneqareersut katersorsimasai.
- 4) Taasariaqartut allat. Kalaallit tusagassiorfii pillugit Nuummi ataatsimoorussamik oqallinnissamut ulloq 15. juni 2015, Oqaasiliortut ilanngussassaqaqarnersut tusarusunneqarpoq. Oqaasileriffimmit Beatrine Heilmann peqataassaaq. SH-p erseqqissaatigaa Oqaasiliortut oqaatsinik atuinernik uparuartuisussaataannimmata, namminerli tusagassiorlutut peqataassamaarluni nalunaarpoq, tasanilu nammineq isummersuutini apuussamaarlugit. Isummersuutit eqqartorneqartut tassaapput KNR pisussaammat kalaallit oqaasiisa tusagassiuutini eqqortumik atorneqarnissaat nakkutigissallugu, ajornartorsiutaammat assersuutigalugu atuagassani oqaatsit allassimaqqaarneri amerlasuutigut qallunaatuujusut atuarumaneruneqartarmata, nutseriinnarnerlu ajornartorsiutaalluni. Tassungattaq atatillugu kissaatiginartutut eqqaavaa KNR-imi oqaatsinik nakkutilliisoqalernissaa kukkusumik atuneq annikillisarneqassappat. Tassunga atatillugu CCO-p ilanngullugu eqqaavaa Tusagassiornermik Ilinniarfik qanoq iliuuseqarniarnersoq tusarusunnartillugu, tassaammat akisussaaqataasoq tusagassiuutini kalaallit oqaasiisa atorneqarnerulernissaannut.

Inussiarnersumik inuulluaqqusilluta

Carl Chr. Olsen  
Siulittaasoq

Judithe Denbæk  
Allatsi